

DOMENIE V DI PASCHE

Antifone di jentrade cf. Sal 97,1-2

Cjantait al Signôr une cjante gnove parcè che il Signôr al à fatis robonis; al à palesade la sô justizie in face di ducj i popui, aleluia.

Si dîs Glorie a Diu.

Colete

Diu onipotent e eterni,
rifinîs di un continui in nô il misteri di Pasche
par che cul jutori de tô protezion a puedin rindi une vore
e rivâ a la gjonde de vite eterne
chei che tu ti sêis indegnât di rinovâ cul sant batisim.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE At 9,26-31

Barnabe al contà ai apuestui cemût che, par strade, Saul al veve viodût il Signôr.

Dai Ats dai Apuestui

In chei dîs, Pauli, rivât a Gjerusalem, al cirive di metisi insieme cui dissepui ma ducj a vevin pôre, che no ur pareve vere ch'al fos un dissepul ancje lui.

Alore Barnabe lu cjapà, lu menà dai apuestui e ur contà cemût che, par strade, al veve viodût il Signôr, che i veve fevelât, e cun ce fiât ch'al veve predicjât a Damasc tal non di Gjesù. D'in chê volte al leve e al tornave cun lôr a Gjerusalem, predicjant cence pôre tal non dal Signôr. Ur fevelave ancje ai eleniscj e al cuistionave cun lôr, ma lôr a tentarin di fâlu fûr. Vignûts a savêle, i fradis lu compagnarin a Cesaree e di li lu faserin partî par Tars.

La glesie e viveve duncje in pâs in dute la Gjudee, la Galilee e la Samarie. E cresseve simpri plui e e leve indenant tal timôr dal Signôr, imbombade dal confuart dal Spirtu Sant.

Peraule di Diu.

SALM RESPONSORIÂL dal Salm 21

R. Ti laudi, Signôr, te semblee dai fradis.

O ben:

R. Aleluia, aleluia, aleluia.

Vualtris, ch'o temês il Signôr, laudaitlu,
gjernazie di Jacop, dait glorie a lui.

O sodisfasarai i miei avôts denant di chei che ti rispietin.

I puars ch'a mangjin fin passûts,
ch'a laudin il Signôr chei che lu cirin,
ch'al vivi il lôr cûr par simpri. R.

Che si visi e ch'e torni dal Signôr
dute la int de tiere,

che si butin in zenoglon denant di lui
dutis lis gjernaziis dai popui.

Ducj i grancj de tiere a vignaran a riverîlu,
si plearan denant di lui ducj chei ch'a muerin. R.

La mê anime lui le à fate vivi:
lu servissarà la mê dissendence.

E laudarà il Signôr par simpri.
A vignaran e a contaran de sô justizie,
a disaran al popul ch'al à ancjemò di nassi:
«Cheste e je propit la sô vore!». **R.**

SECONDE LETURE 1 Zn 3,18-24

Chest al è il so comandament: ch'o crodìn e che si volin ben.

De prime letare di san Zuan apuestul

Frututs, no stait a volê ben a cjâcaris e cu la lenghe, ma cui fats e te veretât.

Di chest o cognossìn ch'o sin nassûts de veretât e o podarìn meti in pâs il nestri cûr denant di lui, ancje s'o vessin cualchi rimuars. Diu al è plui grant dal nestri cûr e al cognòs dut. Miei cjârs, se il nestri cûr nol à nuie ce rimproverânus, o vin confidence in Diu; dut ce ch'o domandìn lu vin di lui parcè che o metìn in pratiche i siei comandaments e parcè che o fasìn ce che lui al à agrât.

Chest al è il so comandament: ch'o crodìn tal non di so Fi Gjesù Crist e che si volin ben un cul altri, seont il comandament che lui nus à dât. Chel ch'al met in pratiche i siei comandaments al reste in Diu e Diu in lui. E di chest o savìn ch'al reste in nô: dal Spirt che nus à dât.

Peraule di Diu.

CJANT AL VANZELI Zn 15,4.5

R. Aleluia, aleluia.

Restait in me come che jo o soi in vualtris, al dîs il Signôr;
chel ch'al reste in me al bute une vore.

R. Aleluia.

VANZELI Zn 15,1-8

Chel ch'al reste in me e jo in lui, chel al bute une vore.

Dal vanzeli seont Zuan

In chê volte, Gjesù al disè ai siei disepui: «Jo o soi la vît vere e gno Pari al è il contadin. Ogni cjâf che in me nol bute nuie lu cjonce, e ogni cjâf ch'al bute lu cerpîs, par ch'al buti inmò di plui.

Vualtris o sês za monts pe peraule che us ai contade. Restait in me come che jo o soi in vualtris.

Come che il cjâf nol pò fâ uve par cont so, se nol reste te vît, cussì nancje vualtris, se no restais in me. Jo o soi la vît, vualtris i cjâfs. Chel ch'al reste in me e jo in lui, chel al bute une vore, parcè che cence di me no podês fâ nuie. Se un nol reste in me, al ven butât fûr come une vidice e si secjarà; po si lu tire dongje e si lu bute tal fûc a brusâ. S'o restais in me e lis mês peraulis a restin in vualtris, domandait dut ce ch'o volês e us sarà fat. In chest al è stât glorificât gno Pari: che vualtris o rivais a produci un grum e ch'o diventais cussì miei disepui».

Peraule dal Signôr.

Si dîs O crôt.

Su lis ufiertis

Diu, che pal incuintri sant di chest sacrifici
tu nus fasis vê part de tô divinitât uniche e infinide,
danus, par plasê, di testemoneâ cuntune vite degne
la tô veretât ch'o vin cognossude.

Par Crist nestri Signôr.

Antifone a la comunion Zn 15,1.5

Jo o soi la vît vere e vualtris i cjâfs,
al dîs il Signôr;
chel ch'al reste in me e jo in lui,

chel al bute une vore, aleluia.

Daspò de comunion

Signôr, ti preìn, cjale di bon voli il to popul
e, daspò di vêlu inscuelât cui misteris dal cîl,
dai di passâ de viere a la gnove vite.
Par Crist nestri Signôr.